

## 雨霎仔

王佩雯

雨毛仔一絲一絲對窗仔門畫落來，雨閘仔嘛開始參雨做伙咧唱歌。聽著佇厝頂咧跳舞的雨滴，我嘛想欲做伙來去享受大自然的嬌。

俗語講：「田嬰結堆，著穿棕蓑。」田嬰是我佻阿姊的好朋友，定定天頂若烏陰，就來邀請阮出去迤迤。「阿姊！落雨矣！咱緊來去看覓。」逐擺若聽著落雨聲，我就會和阿姊做陣擰雨傘出去覘玲瓏。揸一跤拔桶，行過街仔厝，去簾簷跔承水；行過田岸，看露螺趁出來和逐家相借問。

敢會受著學校教誡濟環保愛地球的影響，我和阿姊總是會揸拔桶佇簾簷跔咧承水，當做天頂落落來的獎品。看著拔桶的水一滴一滴，沓沓仔承甲滿墩，隨想著古早人講的：「毛毛仔雨落久，塗嘛會澹。」細細滴的雨點仔毋但予桶仔愈來愈滿，嘛予阮心內愈來愈滿足，喙笑目笑、跔步輕鬆，趕緊共獎品紮轉去厝裡分享。「阿媽！這水會當用來沃花喔。」阿媽文文仔笑，應講：「慧孫的，花早都予雨水沃澹矣！無，咱揸來去沖便所，好無？」總是，嘛毋知影這桶水敢是猶原流對水溝仔去，毋過這個過程予我有講袂盡的歡喜佻滿足。

講著出去覘街的時，平常時罕得相拄頭的厝邊隔壁擺

從出來。阿姨趕佇大雨來進前趕到厝；阿姆趕緊出來外口收衫；杜蚓仔嘛趁出來散氣，這擺是落雨天趣味的風景。若露螺是對滿田趁到路裡，一擺險險仔去予我踏著，我共好運的露螺拈倒轉去園佇一个圓盒仔內底飼，予伊沓沓仔趁，等待後一个落雨天就放伊轉去。

有時是出日花仔，煞咧落查某雨，天頂會出誠顯目的虹，七色分甲明明。我嘛擰頭看甲喙開開，心肝內糖甘蜜甜，接受天公伯仔的祝福。

大漢了後，翻頭看純真的因仔時，猶原足佻意落雨天，毋過煞無彼个心情通勻勻仔去看雨霎仔，逐工是無閒來、無閒去。足久無感受著大雨淋佇身軀頂的歡喜，有時陣袂記得紮雨傘，就恬恬仔看雨沓沓滴，嘛想起彼當時，期待後擺來一逝「雨的旅行」，和真久無看見的老朋友見面。